

野記
停驂錄摘抄正續
谿山餘話
世說舊注





THE
UNIVERSITY
OF
CHICAGO
LIBRARY
STAMP

序
騷
錄
摘
抄

正續

陸
深
撰

中
華
書
局

紀錄彙編卷之一百二十三

停驂錄摘抄

陸深

陸深

宿州有睢陽驛凡以睢水在其南也然古睢陽乃今
歸德州卽張許死節之地予過而問焉屢更河患
亦旣漫漶矣正統間予同縣人衛君庸知州事嘗
採輯史傳文集爲唐忠臣錄己巳年刻之後正德
己巳翻刊人以爲有數正統有土木之變正德逆
瑾之變在明年庚午八月蓋六十之數云夫文獻
之廢興非特有數亦抑有世道焉

予觀唐之盛莫過於貞觀開元其時文章則燕許沈
宋字畫則歐虞褚薛皆溫潤藻麗有太平氣象天
寶以後多事之日則杜工部顏魯公出焉其辭翰
非不雄偉俊拔也而流離死亡之禍具見弘治末
予初登朝士大夫之賢者皆喜習顏書學杜詩
每與亡友王韋欽佩論之欽佩以爲非佳兆孝
皇質天逆瑾亂政辛未壬申之間霸州盜起攻城
破縣殺戮其慘至煩兩路用兵而川蜀之盜尤烈
竭天下之力僅能克之於是魯公之忠節工部之
詩史亦畧彷彿覩矣嗚呼學術可不慎哉

李憲副夢陽字獻吉號空同子弘正間名士與予交
好嘗約獻吉遊吳卜居予將入梁訪族二十餘年
未酬也嘉靖己丑秋獻吉尋醫渡江留京潤一兩
月予適有延平之行是歲除日獻吉下世予赴晉
陽以庚寅三月二十一日經汴城而西望几筵一
慟而已其子枝字伯材以空同子八篇來貺燃燈
讀之重爲之流涕內論學下篇一條書劉閣老言
李杜事微失旨劉名健字希賢號脩菴洛陽人相
孝廟首尾二十年相業甚可觀素以理學自負
予乙丑登第爲庶吉士與衆同謁公於安福里第

公告諸吉士曰人學問有三事第一是尋繹義理以消融胞次第二是考求典故以經綸天下第三却是文章好笑後生輩才得科第却去學做詩做詩何用好是李杜李杜也只是兩箇醉漢撒下許多好人不學却去學醉漢其言如此雖抑揚之間不能無過然意則深遠矣

予爲庶吉士時謁東山先生劉公大夏時雍公誨予曰初入仕不可受人知知己多難立朝矣只如朋友若兩三人得力者自可了一生過多則晚年受累今五十有四髮種種矣益知其言之有味嘗見

周密公謹所記趙德莊誨趙忠定曰今日於上前得一二語獎諭明日於宰相處得一二語褒揚往往喪其所守者多矣乃知古人造就後進者每如此

予自延平赴山西過潤時邃翁南歸未久相見勞苦外無他語但道子行得無受炎涼乎予笑曰不至是小人炎涼之態可處君子禍福之心可憐翁首肯之曰有是有是

吾松姚蒙先生善醫時鄒都堂來學巡撫江南訪而召之以醫先生見鄒公素嚴重姚有口眼歪斜發動

疾公心輕之問曰汝亦有疾對曰有風疾曰既有風疾何不醫之曰是胎風公卽引手令其診脉姚退却不前再命之再却公始曰診脉須坐呼座坐之姚乃方脉旣畢公問之姚敘病源一二公亦知醫領之最後姚曰大人根器上別有一竅出汗水公大驚曰此予隱疾甚祕汝何由知姚跪曰以脉得之左手關脉滑而緩肝第四葉有漏洞下相通旣久公始改容謝之乃求藥姚曰不須藥只到南京便好以手策之曰今是初七得十二日可到公曰知之矣卽治行果十二日晨抵南京入會同館

而卒吁亦神哉其孫舉人相字清之向在長安爲予道此可見前輩技能難及

召佃之名亦自宋賈似道公田始咸淳戊辰正月改官田爲召佃召人承佃自耕自種自運自納與今法雖不同而其末有所自矣

文潞公富貴福壽古今無比致仕歸洛時年已八十神宗見其康強聞卿攝生亦有道乎潞公對無他臣但能任意自適不以外物傷和氣不敢做過當事酌中恰好卽止神宗以爲名言夫有所享者必有所養潞公龍錦事想亦出於傾陷者所爲予鄉前

輩陳晚莊先生名肅字惟敬清脩之士一日衣緋窄袖袍會席一士大夫素豪侈攬之曰何不改作先生正色曰我福薄恐難勝其人曰文潞公如何是豈知有所享者必有所養也

加耗二字起於後唐明宗入倉見受納主吏折閱乃令石取二升爲鼠雀耗我太祖則每斗起耗七合石爲七升蓋中制也江南糧稅每石加耗已至七八斗蓋併入雜辦通謂之耗意不止於鼠雀爲也近時巡撫乃於田畝上加耗則漸失初意矣五季漢隱帝時王章爲三司使始令更輸二斗謂之

省耗當時人怨之史亦謂章聚斂刻急胡致堂推
本其殺身以爲興利之戒

紀錄彙編卷之一百三十四

續停驂錄摘抄

陸深

陸深

本朝五嶽五鎮之祀多因前代其來遠矣泰山爲東
嶽在今山東泰安州東鎮爲沂山在今青州府臨
朐縣華山爲西嶽在今陝西華陰縣吳山爲西鎮
在今隴州衡山爲南嶽在今湖廣衡山縣南鎮爲
會稽山在今浙江山陰縣北嶽爲恒山在今大同
府渾源州醫巫閭山爲北鎮在今遼東廣寧衛中
嶽爲嵩山在今河南府登封縣霍山爲中鎮在今

山西霍州東西嶽鎮相去不遠此嶽北鎮相望千里而山脉一帶惟南嶽去南鎮三千餘里雖同在江南而間隔絕不相屬中嶽中鎮南北對峙而黃河界之今京師正當北嶽北鎮之中東西亦勾停而華山稍南於泰山若龍虎然南嶽在西南南鎮在東南五嶽爲案而江河兩水爲襟帶嶺南諸山爲朝拜嶺南之南則南海爲外明堂我朝形勝真天造地設哉

正至二十六年丙午中山武寧王將兵二十萬開平忠武王副之以取浙西十一月由太湖直趨湖州

士誠悉發境中兵及赤龍船親軍戰毗山戰舊館
戰皂林烏鎮相繼而敗生擒其兵六萬十四日取
吳江士誠遣銳卒迎戰于尹山橋康蘄公持戟督
戰銳卒盡覆乃進圍蘇城塞其六門刀劍林立金
鼓雷震將士盡降城中食盡至煮靴以充饑九十
閱月城陷時吳元年丁未九月也王封府庫縛士
誠送京師藉其兵二十有五萬檄曰總兵官准中
書省咨敬奉 令旨余聞伐罪救民王者之師考
之往古世代昭然軒轅氏誅蚩尤成湯征葛伯文
王伐崇侯三聖人之起兵也非富天下本爲救民

近觀有元之末主居深宮臣操威福官以賄成罪
以情免臺憲舉親而劾仇有司差貧而優富廟堂
不以爲憂方添冗官又改鈔法役數十萬民湮塞
黃河死者枕籍于道哀苦聲聞于天致使愚民誤
中妖術不解偈言之妄誕酷信彌勒之真有冀其
治世以蘇其苦聚爲燒香之黨根據汝穎蔓延河
洛妖言旣行兇謀遂逞焚蕩城郭殺戮士夫荼毒
生靈無端萬狀元以天下錢糧兵馬大勢而討之
畧無功效愈見猖獗終不能濟世安民是以有志
之士旁觀熟慮乘勢而起或假元氏爲名或託香